

Izjava: OHR – Odricanje od vlašičkog dogovora je katastrofalno za budućnost BiH

Uznemiruju informacije, objavljene u štampi, da Glavni odbor SDS-a odbacuju sporazum koji su njihovi vlastiti pregovarači postigli tokom razgovora o restrukturiranju policije na planini Vlašić.

Ukoliko su ove informacije tačne, to bi moglo imati katastrofalne posljedice za Republiku Srpsku i BiH u cjelini. To bi značilo da je SDS odlučio da namjerno upropasti svoje šanse za ostvarivanje daljnjeg napretka na putu ka modernoj Evropi.

Liderima Republike Srpske treba biti jasno o čemu će se odlučivati kada sljedeće sedmice predstavnici Evropske komisije posjete Bosnu i Hercegovinu kako bi procijenili da li je BiH konačno ispunila uvjete za započinjanje pregovora sa Evropskom unijom o potpisivanju Sporazuma o stabilizaciji i pridruživanju. Komesar Rehn je i u svojoj jučerašnjoj izjavi ponovio da će bez potpunog političkog dogovora koji je u skladu sa principima EU biti izuzetno teško da Evropska unija zaključi da je u oblasti restrukturiranja policije ostvaren «značajan napredak». EU je zaista ozbiljna kada je u pitanju ispunjavanje uvjeta. To zna i Republika Hrvatska, a i Srbija i Crna Gora.

Izbor s kojim se suočava Republika Srpska je jasan. Ovdje se ne radi o akademskoj raspravi. Političari iz Republike Srpske odlučuju o budućnosti svog naroda. Ukoliko SDS sada blokira proces restrukturiranja policije i budućnost Bosne i Hercegovine u Evropi, SDS, i na kraju i Republika Srpska, će

završiti u potpunoj osamljenosti i izolaciji. Dok je Srbija i Crna Gora odabrala da ide ka naprijed na putu ka Evropi, SDS bi mogao izabrati kretanje unatrag. To bi značilo da su umjesto puta ka integraciji i mogućnostima koje im se pružaju izabrali put ka izolaciji i stagnaciji.

Na taj način bi njihov narod, i BiH u cjelini, postali zatočenici svoje prošlosti u momentu kada imaju priliku da ostvare budućnost u modernoj Evropi i dobiju pristup svemu onome što im ta Evropa može ponuditi u smislu zapošljavanja, slobode kretanja, sigurnosti i prosperiteta. Na njima je da izaberu i i snose posljedice svog izbora.